



嘉慶癸亥開雕

秋潭外集



太乙葉舫藏板



秋潭外集目錄

卷第一 尺牘一

座師馮星實先生六首

某中丞

顏耘圃先生四首

王述菴先生二首

卷第二 尺牘二

許秋巖十一首

卷第三 尺牘三

秋巖五首

兩湖軍門

曾雲溪

章實齋

黃當陽

楊長陽

觀察張訥齋先生三首

附來書

卷第四

尺牘四

馮魚山二首

錢潤齋大守二首

浙臬陸璞堂先生

錢湘舫學士

觀察張萼樓先生三首

附來札

學使李雲門先生

邱東河大守

陝甘學使陳遠山學士

李小松閣學二首

卷第五

尺牘五

徐午園五首

張古餘六首

錢縣尉

程禹川

張恕堂

卷第六

尺牘六

葉雲素

楊少晦四首

楊邁工三首

附來書二首

卷第七

尺牘七

馮虛躔學博

馮鷺庭太史二首

林喜亭太守二首

張五峯四首

徐斗垣

某二首

卷第八

尺牘八

提學趙鹿泉先生

贛南觀察蔣礪堂先生

陳竹香觀察二首

謝東野

龔縣尉

嚴洵陽

李石泉

喻石農

陳愚谷二首

荆南觀察陳松門先生

李雲門二尹

曹親家

安南使臣阮侁

覆安南使臣阮侁

卷第九

尺牘九

趙竹岡吏部

白鷺書院山長吳種之太史

吳白广四首

脩靜山二首

朱新建五首

陳花南

趙保靖

卷第十

公牘一

邵雙橋先生四首

差次上陝西上司

差次上江西各上司

差次寄江西諸同官

卷弟十一

公濟二

請添設巨壯烏鎗申文 附議詳

稟各憲籌辦倉穀

請酌改水北白沙漕務章程申文

卷弟十二

啓

迎福公相啓

迎撫軍啓

迎中丞

迎方伯

謝撫軍啓

上童學使啓

上戴蓮士侍郎啓

上汪稼門方伯啓

上陳觀察啓

上顏耘圃先生啓

賀顏耘圃先生陞任迤西道啓

候鄖陽王大守啓

解崇仁縣署舊砲位上中丞啓

賀撫軍姚大夫入壽啓

賀雪

賀歲小箋

卷弟十三

雜文一

吉水縣重脩廟學記

郭大史詩序

梁園唱和集序

知愧錄序

續知愧錄序

蟾芝集序

長陽竹枝詞序

文江小藁序

撚汗集序

汎舟集序

吉水縣祭城隍文

謁文山先生文

謁李忠肅公文

龍濟寺祈雨文

大東山龍泉祈雨雪文

般若菴祈雨雪文

弋陽縣東西二潭祈雨文

浮梁縣祭城隍文

浮梁縣祈雨文

爲我堂銘

跋黃安張石虹先生所藏黃庭石本

題宋刻寶祐丙辰科題名錄後

崇仁縣圖說

跋父母堂匾

書瑞昌縣亭子山東坡題名後

浮梁縣脩城勸諭士民文

卷第十四

雜文二

季考

厚風俗

作士氣

勸保甲

勸息訟

戒鬪毆

禁溺女

諭谷村李姓二首

諭楓坪李姓

諭邑屬士民

諭水北白沙兩花下二首

卷第十五

判牘

曹善連控曹善福等一案

文張氏告文風第一案

王金聲告李岸生一案

徐發興控徐勝傑一案

張繼宗控伍世標一案

張李氏控余國華一案

僧遇蛟控舒氏同李茂章一案

陳素履控陳宇一案

何黃氏控王接儻一案

批楊芬等呈詞

批楊國輔呈詞

曹貽謀等控金清瑛一案

批生員吳家駒等公稟

卷第十六

祭文 日記

秋潭祭婦文

棘闈日記

秋潭外集卷第一

尺牘一

座師馮星實先生

長陽

彭淑

秋潭

淑自去秋來江右適遇屠先生之便敬附一函後補吉
 水又具書一通臆春兩奉台緘知前函已到後書未審
 曾否得達寸心戀戀曷言可罄伏惟閣下還里以來侍
 奉吉慶起居福綏湖山佳麗著述優游縷指古人文福
 意東坡自云出處依稀似樂天者近之矣但泰山之雲
 豈可無心鳴鳳之音詎容終闕冀無忘斯世也淑去秋
 九月莅吉水蓋承十年砂爛而前故任之後一紙交代

無著者數逾三萬又催督務緊迫之時吉水漕倉七處
遠者溪水滯迂或數百里小船僅載十石胥役憑據爲
奸干詭百變不可窮詰兌軍之時非短米卽米不可用
而索分例者不能如意則怒而益其壞蓋十年以來經
手者曾無一年完善淑經理兩月焦急委頓鬚白過半
至於歲底僅免貽悞入春卽爲彙銷著急六月中始克
全完在省垣耽延月餘七月初才還縣而入闈之檄又
下于廿八日重抵省門聽候差遣總計十月以來刻無
寧晷中間夷使經由憲節往返其餘差使絡繹百法支
撐不但容顏顛頽而性靈亦幾爲之汨沒是以數月以

來不敢縷陳以致上厯慈懷今民情頗已帖服胥役奸
弊十去六七地方一切粗有頭緒而淑硜硜之守求無
負于師門及補山鹿泉兩先生所知賞者總不敢失墜
也撫軍才大如海去年誰何入淑貝錦之言一抵江卽
獲訶譴頃莅吉以來頗不以庸俗人相待然數言淑有
性氣將非知己之言乎淑嘗自笑有如羸馬負重轅僨
泥淖中使健者代之必異於羸馬矣以其異於羸馬也
則使之負重轅馳驟泥淖不已苟非怡樂其孰有能撫
而泣之者乎自傷以素絲之質不能刻苦學問爲飢寒
所迫欲逐升斗旣嘗其難而進退無憑中心膠擾蒲柳

弱質早以向衰安得早阮摒擋公私稍清得執一卷之
書周旋杖履乎花黃蟹紫水淥楓丹遙憶吾師攬揆之
辰不獲捧壽觴者十年矣東指海雲額手以祝

馮先生二

去歲家人孫貴自禾中回展讀賜緘續於永新朱令及
祝世兄赴張觀察處之便奉到二次寄札敬諭閣下侍
奉萬福闔第綏吉爲慶伏惟大師母大夫人大事已就
瞬逾祥琴惟望珍攝福履以慰仰望不勝拳拳也淑去
歲爲免糧彙銷十分竭蹶措貸數千金僅而無誤然至
今尚欠司庫雜款三千有餘幸目下頽風將轉大憲清
查倉庫據實開呈淑實彌補二萬而下短尚一萬有奇
公事幸免罪戾私逋逾萬焉能解此纏縛耶西江多事
理勢必然淑豈敢幸人之灾回思吾師札中聲名雖虛

有事之際則喫緊之語洵爲至言淑服膺教誨有年唯以自立爲主此次承上游過聽去臘定予南昌心甚不願幸已邀免不意又予新建計在夏閒恐無計辭脫只可聽之但多病之軀實不相宜不敢過於瑣瀆耳吉郡錢守體面雋爽不愧名家相待甚出格外每詢及師友淵源常記念閣下極甚誠服此吉水近狀可喜之事祝世兄去冬章門承寄札并領到蘇詩一部卽馳札佈謝已返浙矣心甚悵悵楚氛一起在淑里長陽黃柏山淑兄弟等帶鄉勇隨營圍守事平尙不知在何日當此進退維谷之時唯有謹守忠信以安命運而已茲因原南

康嚴令來浙請檄之便附函請安一切近况渠尚能觀縷也

馮先生三

十月初健足回奉到九月十三日寄函捧讀之下如在左右敬悉起居勝常侍奉吉慶欣慰靡涯伏惟閣下守道榮親殫心述作淑以非才荷蒙教訓諄諄惟有日愼一日以求仰副期許吉水萬分難爲日救過之不暇盡心安命聊足自解但公私兼迫日受熬煎精力漸就頽靡爲可惜耳蘇詩刻成得先睹爲快獨惜淑躬親受業不得與校讎之役以附名末簡未免悵悵抑更有請者東坡人中麟鳳其出處經緯政蹟交遊詩文書畫詩話談諧若刺取有宋以來至於本朝名人之集集爲東坡

事類一書此亦似世所不可少者吾師若肯以餘力爲之更可以嘉惠藝林未稔有當否歲內鹿鹿開春當覓便呈少許剞劂之資尙祈節嗇精力寬養心神以綏後祿

馮先生四

去秋恭函略陳近狀大概遂因循一年未得馳書顧心中實有大段鬱結恐上縈念慮耳中間得江寧許守書敬知閣下已屆祥琴侍奉榮慶唯多方念淑恐其悻悻自好動罹愆尤爲慮又一奉鈞諭諄諄訓戒感激之中與歉仄之懷交深於五內并知兩世兄及時自効雖深爲欣慰又每以吾師年近六旬郎君俱以仕宦遠離左右未免承歡乏人時切念念也淑自去夏以來屢奉大憲嚴加訓飭惟有自怨自艾雖兩年前已有乞閒之請至此不敢再陳所幸莅吉已經五載民情安戢獄訟稍

衰地方之事不至上費憲心今秋奉調入闈十月甫經
旋署漕事甫畢卽值憲節出巡已荷察淑無他頗降詞
色又值西臺到任卽四年前吉安郡守待淑最出格外
淑唯有循分供職目前不敢作乞身之想矣

馮先生五

中夏接江寧許守來札驚聞師母夫人之變續卽接奉
吾師前後兩札捧讀之下敬悉一切而傷感之懷無以
爲喻伏思淑自京邸依栖以及客遊豫章藩署荷蒙師
母夫人垂慈憐念不比尋常自甲辰叩別不復得以瞻
仰慈顏邇來薄宦羈滯已復十有餘載方冀有日登堂
稍遂依戀之情乃鶴馭遽遙祗深悲慕伏唯閣下白華
斑衣侍奉榮慶方今
聖政維新舟楫鹽梅
朝端虛佇忠孝一身所闕甚鉅唯祈以時珍攝以慰識

者之望是所至禱朱全來詢悉一一兩世兄名宦相通
以致師母夫人大事之際未克躬親但祥琴瞬屆淑意
將來當畱一不出隨我師以待奉大老夫子是亦忠孝
兩盡之一端也淑今年以來竭蹶倍於常年凡事謹遵
訓誨以期稍免愆尤往年彌補之數今歲僅能不續虧
下去力之所不能亦無如何也計典聞可得薦果然則
出於意外且明歲或得升堂瞻覲思之不勝欣喜人便
附上紙墨二函同門卷四本廟學記兩幅惟祈鑒入

馮先生六

正月下旬接到吾師臘底賜函敬悉一切并蒙厘注以
淑去歲一年來光景久未得一信爲念其時計附去江
寧信在正月方能得達茲於三月中得許守來緘復奉
賜函知前信已承慈鑒溫慰有加曷勝愧戀并稔道體
康健侍奉吉祥承示大老夫子頤養歡慶師母墓田丙
舍均已料理完善兩世兄侍奉左右蘇詩風行海內名
山之業猶許淑輩卒業以傳之其後仰見吾師進退綽
綽但

聖皇勵精求治急於得賢之日吾師聲望久隆恐東山

未能偃息也

某中丞

淑奉委署吉水縣事於二十六日到任接印視事體察地方民情尙爲寧帖一切公事頭緒繁多正須逐漸清理不敢稍存怠忽惟是吉邑地當孔道又值積疲之後歷任當竭蹶無措之時每假手於胥役旣受鉤餌往往瞻顧以致若輩見多習慣神姦展轉遂成牢不可破之勢然原其致病之由地丁須鄉徵弊竇甚多防之已屬不易若漕倉分於七處不能兼顧情形之難數倍於他邑若輩滋蔓難圖實有城狐社鼠之喻淑甫經到任不敢稍縱以益其廢弛亦不敢過急以防其意外惟有盡

心盡力期於公事少有裨益至吉邑受累實在情形及如何辦理之處淑二十六日到任二十七日卽赴郡見本府顏守多所指授具有條理勿煩上厯鈞懷也

顏耘圃先生

二十七日躬赴郡齋荷蒙溫訓諄諄凡所以念切民瘼而愛惜屬吏者開誠佈公無微不至感愧交并有不能不盡之言有不忍遽白之隱自惟庸才下吏何以副委任而酬知遇惟有實力實心以圖報稱於萬一漕務事宜眼前急著現在細意斟酌以期有得手之處一俟得有頭緒卽當縷悉稟陳勿煩過慮也

耘圃先生二

初三日午刻觀察舟過下邑敬悉台臺護送夷使至萬
安百嘉地方計日內可以還郡伏唯臺候吉祥不勝欣
戀本日戌刻桐江地方獲到鰕魚一雙鱗鬣生動斫鱠
必佳謹泐函馳呈昔槎頭詠美於浩然樊口著名於蘇
子今茲嘉魚庶邀大賢齒頰清芬流風歎羨瑣屑愚忱
輒以上瀆曷勝竦皇之至

耘圃先生三

今春接奉台函極蒙垂念殷勤莊誦銜感之餘祇覺萬
里關山如在咫尺耳敬稔閣下久秉臬篆勳業日崇布
來哲之經猷沛斯民之膏澤凡在煦覆之下者其歡欣
鼓舞正不閒於遐邇軍興旁午倍益賢勞伏惟起居綏
吉

天眷彌隆曷勝瞻依欣頌之至淑庸劣無似吏治未嫻
且地方廢壞之形久邀垂鑒三載以來不敢稍自偷安
惟事事盡其拙誠勤勉供職今民情雖頗貼服一切粗
有頭緒而棘手且日甚一日前任遺交倉穀原虧一萬

二千有奇淑節省儉用本年秋冬已全行彌補又王光祖卽王壯行亦於秋閒設法在袁州地方掣獲現在擬辦發遣用附稟陳淑行年四十有九蹉跎歲月一事無成年來公私竭蹶不堪言狀寸心鬱結兩鬢皤然現擬引疾尙未卜得邀允准否也感戀知己私中百結

耘圃先生四

月前出闈後欣逢節鉞榮臨得遂瞻仰數載飢渴於焉稍釋惟是初因抱疾未能遂其亟於迎謁之懷荷蒙不次垂詢迨入謁之時望顏色而悲喜交集陳離懷而縷言莫罄乃蒙台臺所以矜念而慰藉之者無所不至情猶骨肉豈二天之可喻士遇知己匪感恩之可言數因請謁備領訓誨靜坐感泣不知所措伏念淑山陬單寒負性愚直作吏西江以來十有二載每思以廉恥勵身以勤儉育民而性拙才疎叢咎滋甚幸遇上憲多賢每賴容保中間不無自疑之處又因數爲賢者所許是以

惟思寡過於其所自守者不敢失墜猶記庚戌去弋陽後趙鹿泉先生按部廣信以所聞言於鐵松中丞歎許不已辛亥在崇仁時補山相國時爲兩江總制來巡江西淑迎謁安仁舟次於時同見者有今寧州陽牧餘干高令補山先生見淑手版有同素識云吾知子矣愛百姓不要錢能辦事又肯辦事稱好官者再三淑悚然不敢對由是自到省返江南入內閣每每言及此二事人多知之淑不敢以洩於人竊思兩先生者或過聽輿論或謬採風聲乃若親出閣下甄陶凡淑性情疎脫才識劣陋皆在洞照之中矜以繩削加之獎藉不以眾人遇

之區區感懼之懷有深於補山鹿泉兩先生者何者兩先生以傳聞爲獎飾雖淑冒不虞之譽無損於賢者盛心至親依左右仰承表帥如影在鑑絲毫難以假借而乃鑒拔於稠眾之中賞識於風塵之外此淑所以夙夜撫心愧畏無地者也自閣下晉節滇南以後僅及五載本府錢守逾格相待多方保全是以此於地方一切得以稍有起色無如地當孔道撐拒維艱或蜚語之時聞每轉喉而觸諱加以里門烽火松楸念重憂患之餘多病早衰年僅五十而頭白龍鍾名宦之心亦盡矣是以屢次乞閒未蒙鑑允公家無絲毫之益一身有邱山之損

旦夕焦灼愧悔滋深乃又意外欣逢閣下晉見之下憐
惜煦然蓋生平未有之知遇是淑有不能徑行之意而
衷曲所有有不得不大段陳述者也伏惟閣下以經世
之略遇

特達之知封疆重寄知在卽日其所以愛惜屬吏者無
非上承世德家學有大臣以人事

君之心而無一豪意見淑亦稍抱志節萬萬不敢稍有
私意陳懇惟祈矜其頽憊無志加之訓迪曲賜矜全俾
得知過必改奉身瓦全免於罪戾則有生之年皆戴德
之日也叩辭後二十六日遄行初一日抵署地方民情

寧謐獄訟稀簡漕務事宜謹懍以求妥善節憲出巡在
卽雖急遽之時仍當次第料理未免刻無暇晷耳賤體
漸次痊愈雖精神驟難全復以時調理可以無慮一切
知厘鈞懷理合縷呈無任悚惶之至

再昨於二十一日由郡送差回恭奉兩次鈞函荷慈念
之殷拳聆訓誨之切至特頒藥物洞見葵私多病所需
自外酸鹹之味平生所學倍慄藥石之箴惟有勉竭駑
駘仰酬知遇感激之私匪言可罄

王述菴先生

淑於乾隆五十三年戊申冬杪在瑞昌縣時值閣下開
藩江右謁於潯陽道中己酉春卸事赴省卽蒙委署弋
陽仰荷開誠訓迪格外矜全私衷欣幸以爲得大賢以
爲依歸不意才數月閣下以司寇

內召中心鬱結莫可名言蓋泰山北斗雖人所共瞻而
寸中私幸冀得近出鈞陶之下垂得而復失之寔命不
猶至今耿耿以迄於今亦越九載旣還吳下又已數年
末由一叩起居去冬江寧許守來豫欣知道體康強今
春刑部主事馮君敏昌過吉水細述閣下里居一切吉

勝事益復歡喜無涯

朝廷優待大臣鄉黨尊隆耆舊天下仰望賢人真大平
盛事儒者光華豈風塵下吏所能贊歎然小草有心曷
嘗不在陽和雨露之下也淑荆楚凡材豫章下走勉強
爲吏甚非所欲旣已無可如何惟固守方寸立定腳根
十年以來如一日僅僅可以無負期望之意但風氣頽
靡事故紛紜中材涉世恐懼多端義命自安之外別無
善策若得公私俱清得以書生本來還其田畝則至樂
矣

王先生二

去夏家人黎壩回奉到台函并沐青浦詩傳及詩扇之
賜捧誦之下欣愧交并嗣璞堂廉使來江又領到札賜
家刻種種矯首吳雲祗深馳慕閣下一代龍門天下志
節之士所以扼腕撫膺希光景以爲榮而閣下煦噢嘘
植若將不及至如淑者亦得以仰邀訓誨蓋獎藉人材
揜挂風會古大人君子之用心固如此也淑匏繫吉水
亦越五載去歲一年之內上游屢更人事紛紜不堪殫
述六月左脅患腫毒如盂百餘日始愈元氣大損又獲
怒於上欲登白簡璞堂廉使初未得面力爲委曲是時

淑愚甫小愈未得晉省乃廉使已移節浙水徒抱悵悵
刻閒在省力懇上憲乞一閒曹未得允准且還縣俟彙
銷完後再爲婉懇至淑磴磴之守不敢失墜亦嘗自檢
制不至涉於客氣但中材涉世恐懼日深耳去歲春閒
擬移淑南昌後又擬新建淑必不就也然皆未果後又
擬予玉山但須代豐城彌補淑力辭臘月又擬移豐城
凡皆淑所不就而其實皆未果然也瑣屑何足瀆陳知
厓台念故并及之聞大集開雕想已竣輒欲先覩爲快
前呈學作詩三冊倘得惠邀點定賜之訓言庶菰蘆下
士知有向往他日得侈爲門下之末誠不勝榮幸矣

秋潭外集卷第二

尺牘二

長陽 彭 淑 秋潭

許秋巖

四月七日章門獲讀手書回環玩誦如見顏色都門小
別才如昨日忽忽已近三載日月不居霜華上鬢良朋
悠邈我勞如何來箋文情深摯出入懷袖彷彿在清風
朗月之下眷念之情因之益切閣下迴翔省闈領袖雲
司經猷所佈傾佇朝賢知不徒以墨藩衣香輝映列宿
也淑行年老大一事無成強顏爲吏一切非其所習蓋
所苦者縷言難盡而窮不與焉所甚難者縷言難盡而

尺牘
民之刁健不與焉拜迎官長是真受用鞭撻黎庶是真
經濟趨跣諾虎森然與槐柳齊列是真榮寵蘇詩云俯
仰隨人如桔槔迂哉闊哉不足又道者也賤體素弱頃
來更羸甚藥裹粥湯終朝爲伴緣兩腿患溼瘡蕉葉之
飲不近者年餘撥冗時尋小自在一攤書卷然非說部
卽格格不入閒作小詩不能成章輒棄去古人稱俗吏
想正謂我輩耶每得閣下書必能少展胷臆願時時惠
之長郎頭角早露近已作文否老兔又生英物觀其得
意其神候必定更可爲之欣然三復來札云有田不歸
如江水之歎先得我心何日得歸山買薄田與吾兄踐

結鄰之約耶

秋巖二

一別如雨遂近十年頃兩載以來未奉手筆昨年得閣
下出守吳淞之信塵狀鹿鹿至今未修牋候歉仄之懷
如何可言伏唯閣下家學治譜蘊蓄宏深辭承明之直
守股肱之郡東南民力得神君而蘇息之龔黃之業豈
唯古人上春吉郡永新令姜君自華亭來晤言之次詢
悉起居知閣下一菴松江卽三縣得蒙緩徵今年遂邀
恩免其造福無窮使人歎想小馮君之詠謳頌不獨吳
會也淑自辛亥在崇仁丁先慈大故至壬子四月返楚
癸丑暮春之初至鄂城七月再到豫章卽奉補吉水矣

吉水故家遺澤已盡而流弊多端俗敝吏刁實稱難治
十二年來歷十有四官百務墮頽前政又係病故虧累
遂逾三數其漕倉分於七處黠吏據爲城社艱於措手
抵任兩月髭鬚皤然今且兩年以來拜馬折腰無日不
與悉索做賦無役不從山色不如歸興濃奈公私逋負
何知吾兄當念我且笑我也得星實先生札以閣下之
出守爲屈竊意天生賢者原爲斯民當難爲之時前人
所云寬一分民受一分之福如閣下莅松三縣緩徵之
事乃其一驗況展佈方新他日必有不朽事業不可以
眾人計校待賢者也淑作令九年一切不堪言述唯方

寸未虧腳根尚定可以無負故人病骨支離彙銷出後
擬乞一閒曹稍得息肩未知得遂否胡璜溪近况好佳
王華亭前接其一札匆匆未得覆候蠢茲有苗尚外干
羽湖湘一帶未免騷然耳姜君人回三泖草泐佈候語
無倫次唯臺鑒不宣

秋巖三

去歲秋冬之際兩奉手書臘間一函郵寄想應早達典籤入春以來伏唯台候綏吉百凡暢遂但未稔大旆會否已到金陵之任爲復仍句畱海上也西江時事幸復寧帖貌似完善而中餒難支卽如本年輪免三府之糧吉稱佳郡殆無一處不竭慶吉水乃尤甚淑百計措貸空中樓閣幾及二萬于民間會無絲毫之獲大段公事可以無悞然非常債負眞有如蚊負山之喻矣念自莅吉水于今三載歷任所空三萬此次彙銷一出計彌補當三分過二年餘之內若得彌縫齊全卽可乞歸庶幾

子孫他日不受拙宦之累知閣下必不哂其迂而有以
哀其愚誠也三苗未格正費經營而荆襄羣盜忽焉竊
發三舍弟幸去冬來江但家兄在里門長陽窮縣雖賊
當哀憐然風鶴之警晝夜惕惕二月初已遣人赴里探
問至今未得一音頃聞襄鄖兩府被圍甚急其鍾祥東
湖歸州宜都枝江松滋一帶無不騷擾嗟乎大平之赤
子何故而相率爲賊歟武漢之間當不相及閣下無以
爲慮海洋頗復平靜閣下可息肩否便中望惠示爲慰
家人朱祥赴京省母飭其由秣陵投書閣下此僕誠直
有血性可任哀其甚病已囑渠到江寧可暫就調養五

年前令其持書京中閣下曾見過渠也

秋巖四

莫春三月專遣家丁去秣陵函佈縷縷旋奉到閣下手書知大旆二月九日已抵舊京閱鈔報又知到署未久卽隨大府臨邊賊耗傳聞不一大約已屬遊魂想刻下已返節也極念極念雲樵諒不久淹秦淮所訂目下未能送上不得不斲累閣下代墊計吉水脫身當在五月以後其時方能歸款耳潘巽山昨過吉值淑在郡垣于客舍晤談半夜解舟而去行役之詩極富其高興可喜也前差去家丁札內一切茲不復贅唯單先生所說瘡藥希多覓寄我爲望自春入夏賤體無日不病進退維

谷付之無可奈何而已二小兒初學開筆頗似有造諸
孫讀書足以自娛第二孫男六歲成誦得唐人五七言
律詩數十首音韻鏗鏘琅琅可聽足散人懷古人云聊
娛目前自餘一切皆非意計所能到閣下閱此當掀髯
一笑耶

秋巖五

十載相思魚來雁往一旦滕王閣畔聚首匝月雖公事
紛紜而文酒笑語恍然在長安時且又得雲樵似天外
飛來此樂真無涯涘南浦春水送別黯然仙舟發後數
日北風大作屈指當在吾湖與匡君晤對想抵秣陵正
過花朝也淑於閣下行後三日登舟廿五日已抵荒署
軍興旁午首以催科爲重糊塗又過一春楚米六萬分
辦已訖昨得楚信長陽黃柏山之賊負嶠如故襄安兩
郡風聲甚厲而羅山確山信陽之賊流入德安又逼近
孝感九江現值戒嚴想閣下又當隨大府料理羣盜如

毛秦蜀已復蜂起滋蔓難圖乃至於此今日勢不得不分兵力以辦賊而要害之處尤不可無重兵宿將使賊不敢窺伺如荊州宜昌人所共知德安爲申息北門目前更宜宿重兵使其不得過孝感一步窺漢口而驚武昌專力撲賊而略鎮守非善之善者也西江戰兵不過三千去其二而兵空措餉每年數十百萬而庫空閩米楚米合計三數十萬而倉又空恐各省情形相去不遠倉卒之際將若之何淑去年有添募民壯演習烏鎗之稟撫軍批兩司并詳制憲事雖未行制軍處已經有案閣下試查閱如蒙奏請在今日亦非細故也孱體多病

還署以來夜輒不能眠甚至通夕不能交睫公私之急未有甚於此時所恃此心甚定旣已不能抽身亦聽之而已附書目一單或能便覓或秋閒再專人來也今并差此僕往大倉王少司寇述菴先生處投信一切均祈照拂唯萬萬爲
國自愛臨穎馳切不備

秋巖六

杪秋陳文學自金陵來吉奉到手械具悉種種閣下守
佳郡調首繁經猷所佈照耀東南自恆情窺之鮮不謂
瞬息萬里動定靡不如意而閣下懃懃懇懇念民生之
彫敝厘公事之艱難海疆萑蒲日事經營五馬雙旌有
靡盬不遑之詠公爾忘私此自賢者之事顧其意旨鬱
勃未免有自惜袖短之意念之倍增棖觸月來鹿鹿未
得修候乃于十二月十八日復得閣下寶山海次一札
知經略海上刻下尚未得履金陵之任賢者處世獨爲
其難北山詩人詠之矣三日五匹新婦好手當不至嫌

織作之遲耶淑莅吉水刁傲之區夏閒彙銷出後雨澤
偶愆搶穀之案遂至三十餘起鹽引擁滯大憲遣武弁
帶兵緝私于境內大有所傷又有光棍王壯行視官如
戲十年未獲勢難更令疎縱親赴查拏八月內密于鄰
府獲回又有鬪殺二命之案其他種種費手之事難更
僕數蓋亦數月在外幸俱摒擋清楚又屆收漕正頭痛
眉感之際奉檄籌補倉穀吉水倉穀二萬前政虧空僅
存三千零地瘠民傲地方一無籌畫且茲縣漕務乃西
江第一難題十年來曾無收第二次者今淑已當三次
瞻前顧後百計躊躕又添數千債負然後穀石買補一

半上倉一半繳價藩庫幸而全完其漕米雖已全運省
倉而費用不貲正在竭蹶之時不意清河觀察初未一
面似深入萋菲大爲掣肘幸新莅錢郡伯一見知賞與
糧臺破面始將所委衛千總來縣收米者掣回餘事尚
未清楚遂屆年終而吉郡明歲免糧之檄又下初擬引
疾力乞解任撫軍旣北上各署憲不使淑啓齒且待免
糧彙銷出後然後決計東坡云山林飢餓古亦有無田
不退寧非貪竊意閣下行藏似尚可以自由至如淑者
但求還我窮措大徐行雅步千難萬難閣下尙有以策
我星實先生今年得三次信尙未得通一書閣下便中

有信去幸將淑近况言及明春當當奴來候并往杭州也吉水情形良善皆安但奸人側目耳閣下無以爲疑

秋巖七

中春錢潤齋大守督運之便舟次作札并去年未寄之
械同雲樵一項轉寄想早呈臺端矣四月八日得二月
三十日賜函反覆讀之如與良朋覲面所聞淑年來光
景大概俱真其規切不肖處皆閱歷甘苦之言閣下云
虛爲此論不能深悉光景然藥石所論已道盡不肖意
所欲言擇而從之免於罪戾斯吾子之賜也雖然不肖
之病深矣世人貴謾而吾不能作僞世人貴輒而吾不
能體柔世人尚利而吾赤手世人重勢而吾孤寒又以
爲人間應有羞恥之事而我生必有本然之心持此術

也以涉世惴惴焉恆有將及之懼而十二年來爲人所包容多矣縱復小加呵斥亦必有以致之誠宜自怨自艾積誠以動之而尚未免以矯激之意深長者之竊慮煩良友之關心小人哉淺之爲丈夫其疾已入膏肓若更益之以客氣則非人矣閣下之病未必不與淑同但治除外症則折肱矣便中尚時以鍼砭及我幸甚河決益張楚氛日甚退無以爲一身之謀進無以効當世之用人生如此抑有何樂淑旣不能返荆南問宅秣陵斷非所及苟得乞閒擬於蘇子由監酒之州賃宅小住亦尚非目前事耳星實夫子處久未有信去便中祈爲道

及今年孟亭先生八旬擬必專人赴禾也

秋巖八

瘦骨支離病過一春每懷雅範思詠維勞比於遞中附
致兩緘未審會否得入掌記伏思禔履安佳光輔

泰運鴻毛之遇順風巨魚之縱大壑足爲閣下頌矣
天子仁聖如堯禹英武如

列聖我輩生逢斯時何幸如之竊以臺中諸公不必毛
舉細故而閣部敷陳宜有濟時之策至誠惻怛以副
清問且事關

國計民生必詳必盡

當宁虛懷立可見之施行若遇事隱約其辭含意未申

和酒夕集 尺牘
以爲恩出自

上是上有

堯舜而諸君子不自比於夔皋藏身雖固負吾

君矣淑僻處下邑見聞稀闊可喜可傳之事尙望時有
賜知以慰下懷耳淑體中一春不佳中氣不足時時倦
劇有如勞乏近更有徹夜無眠之時言於上官同僚多
以不肖之心相待而衝途下吏又不能得有暇逸屣提
波羅蜜正自可爾無奈維摩示病何也前札所需藥物
可得更望示知或賜一安人賞信在存則更妙矣潤齋
郡公督運想得把臂茲其司閫假省來寧其人正路體

面知事因附緘囑其專投渠有親戚李榮老矣今歸寧
欲從閣下丐一托足之地祈錄之知愧錄一册墨刻三
種侑緘以博一哂謹拜候近安餘續寄不宣

秋巖九

閣下游墅所發遞中一函悉去役并前致兩緘均已得
達審吾兄起居佳安足慰懷仰先是正月二日奉星實
先生杭州寄札比去役二月三日回吉得禾中來書縷
悉一一十一日又奉到閣下垂念勤拳二千里外不翅晨夕
泉先生寄緘伏承閣下垂念勤拳二千里外不翅晨夕
晤對所以砥礪而屬望之者意良厚而其義又非世人
之所嘗聞也且感且愧淑比聞
大上皇帝升遐廿日以來寸衷哀痛至不可言忠孝
天性無可解於心又自傷生逢

堯舜而垂老無聞故也

今天子聖孝生知三年之忍天下服其仁一朝之斷天下服其勇大憇去而中外肅清

朝野欣欣繼美

列聖比隆殷周誠千載難遇之時伏惟閣下歲寒抱松柏之心礪世有干鏌之才彈冠相慶宏此遠謨他日汗青照耀俾天下後世指爲景星卿雲吾道之光永以相祝淑長自培婁酷無成就雖抱硜硜之節而潦倒風塵無足比數安得不與草木同腐耶閣下努力自愛豈不欲往畏我友朋良時在茲勗之而已近因春巖司馬攝

吉郡援例呈請迴避并卽乞署閒曹能否得請再以奉聞星實夫子秋閒六旬或我兩人聯銜致祝亦可老色白上面歡情日去心正賴良友箴規及時爲善閣下必時有以策我謹此拜候并問潭祉十五官好佳念念

秋巖十

十月一函由郵遞附致想得入覽卽日伏惟臺侯起居
佳安足慰景頌

聖治維新吏治當蒸蒸日上天下拭目想望大平吾子
彈冠相慶此其時矣三代而下論治者淑嘗服膺兩言
曰爲政不在多言曰去其大甚閣下亦必有味此旨也
淑今年竭蹶倍於往歲唯此心泰然倉庫之事往年計
彌補一半今年僅能不虧累下去恐責我者不以爲然
然而無如何也比因非常拮据星實先生處至今未差
人去茲已歲莫因春崖紀綱來白下專札奉布并附禾

中一信祈閣下爲措墊二數撥差代致或於開春續奉
上尊處或淑竟能同春崖兄便過秣陵得快晤更幸矣

秋巖十一

家人回奉手書續又連拜賜函情事縷縷數千里之外
不殊晨夕晤對欣慰之私無可言喻就稔台候百凡佳
暢大賢相聚凡

國計民生所以扶翼

新政者心勞體瘁望風懷仰至爲念念松江舊案比有
風聞雖甚切於懷然知我兄無糊塗事馳詢何春崖三
兄具得此案顛末屹乎不可動搖得手書知果蒙

天鑒以此徵天理人情之中著腳最穩漢廷老吏必無
冤獄

聖天子洞燭幽隱別白賢能豈勝額慶淑鹿鹿浮沈風塵抱病在公之彌補如捧土益嶽私家之逋累如銜石填海煦然若不及而謬傳爲風厲脂韋之可羞而指目爲傲吏當事陰陽捭闔不可窺測淑欲尋三十六計未著亦不可得也星實先生處比得兩札亟欲遣丁唁問惟窮窘無措然亦再挨不下去大約十月中旬後有專使尊處如有信去望爲先致吳中秀才案大是奇事不知如何了結岳中丞亦淵源師門前來江西屢次問及比淑自楚來江而公已病不見官故未得面謁若言及或尙記憶也茲有奴子回江寧艸札布候此奴卽仍來

江西望賜知近狀一一兩圖手卷亦可付賚來也餘再寄不宣

秋潭外集卷第二終



